

中華民國元年願請家規告示

長沙縣知事公署姜 示

案據長沙北門陳祠祠總陳有林戶首陳保彝陳啟
瀚陳本濤陳本廉陳本泰陳昀等呈

竊民族建祠於省城北門二百餘年因丁口繁眾誥
誡宜先前清光緒四年合族公議族規稟經前長沙
縣立案出示在案現在民國成立百度維新亟應鈔
呈民祠原訂族規十條申請立案出示曉諭爲此具
呈 縣長臺前俯賜察照施行以振族綱而維風紀
實爲公便此呈等情並鈔粘族規十條到縣據此除

批呈悉人民自治端賴家族維持該祠重整族規本縣極爲嘉佩准卽如呈辦理可也此批外理合出示曉諭爲此示仰該族人等一體遵守毋貽隕越實本縣所深望也特示

計族規十條

一戒違犯父母不孝不順是謂忘本在家非令子在族卽爲敗類犯者由族長會同房長公同呈究

一戒停畱異類傳家最貴清白若連結匪人窩藏凶盜干犯法紀貽累家族犯者由族長會同房長公

同呈究

一戒姦淫賭博姦淫則敗德賭博則喪家污穢胡行
貽禍非淺犯者由族長會同房長公同呈究

一戒盜竊行爲子孫宜守本業貧不安分失足穿窬
爲宗黨羞且其父母失教亦何顏見祖宗於地下
乎犯者由族長會同房長查明輕則祠中理處重
則公同呈究

一戒教唆妄告往來構衅遇事生風族之不睦其害
由此犯者由族理處不遵者公同呈究

一戒盜葬伐樹子孫之於祖父墳墓宜修培樹木宜
封植喪心爲此則族中無賴之子也犯者由祠理

處不遵者公同呈究

一戒欺尊凌卑凡在宗族雖有親疎以祖臨之則一體也相欺則不敬相凌則不慈豈祖意乎犯者由祠理處不遵者公同呈究

一戒爭承悔繼不孝有三無後爲大有無嗣者凡在宗族均當憫惻况屬同胞尤宜亟爲關切又本人無子許令同宗昭穆相當之孫承繼先儘同父周親次及大功小功總麻如俱無方許擇立遠房及同姓爲嗣不得應繼不繼亦不得貪圖財產爭承悔繼以致涉訟犯者由祠理處不遵者公同呈究

一戒欺矜孤寡貧窮無告凡在鄰里尚宜賙恤何論
同宗且老弱疾苦親支尤宜分潤惟其人亦不得
藉端需索不休犯者由祠理處不遵者公同呈究
一戒嫁娶失正世俗議昏必擇門第凡悔婚鬻賣轉
房等事名門望族豈宜有此犯者由祠理處不遵
者公同呈究